



SITI Mariam bersama dua anak dan suami di pusat pemindahan banjir di Balai Raya Taman Seri Bayu.

# Tujuh bulan dua kali banjir

■ **Air naik pantas mangsa tidak sempat selamat barang**

Oleh **Nor Shafinaz Sari**  
am@hmetro.com.my  
**Alor Gajah**

**“K**ami berpindah ke Taman Seri Bayu 2 sejak tujuh bulan lalu dan sepanjang tempoh itu, dua kali kawasan ini dilanda banjir termasuk semalam (kelmarin),” kata mangsa banjir, Siti Mariam Abd Ghani, 28, ketika ditemui di Pusat Pemin-

dahan Banjir di Balai Raya Taman Seri Bayu di sini, semalam.

Siti Mariam berkata, dalam kejadian jam 8 pagi kelmarin, keluarganya kerugian RM10,000 apabila barangan seperti peralatan elektrik, perabot selain pakaian gagal diselamatkan.

Menurutnya, dalam tempoh sejam, air separas pinggang dan mereka sekeluarga hanya fikir untuk menyelamatkan diri.

“Ketika kejadian, saya dan suami, Mohd Noh Aziz yang berusia 33 tahun bersama dua anak, Naurah Maisarah berumur tujuh tahun serta Husna Mardhiah berusia lima bulan berada di dalam

rumah.

“Kami lihat paras air meningkat dengan pantas. Kami hanya sempat menyelamatkan dokumen penting sebelum menyelamatkan diri,” katanya.

Siti Mariam berkata, banjir itu dipercayai berpunca daripada sungai berhampiran yang tidak diselenggara menyebabkan ia tidak mampu menampung jumlah air.

“Sungai ini kecil dan lama tidak diselenggara menyebabkan air tidak mengalir dengan lancar. Saya harap pihak berkuasa melakukan sesuatu untuk memastikan kejadian sama tidak berulang,” katanya.

**FAKTA**  
Air naik sungai tidak diselenggara